

VAN WIE BIN JIE D'R ÊËN?

door Kees Fase

'Van wie bin jie d'r êên?' Die vraeg wier vroeger vee hesteld. Nou, laet ik dae oak us wat van vertelle.

Toen ik as klein jongetje (jà, dat bin ik oak gewist) op durp kwam - ik dienke dat ik zo rond de vuuf of zes jaer oud was - misschien net vò of nae de Ramp, en ik was nog nôôit vee op durp hewist, hieng ik bie de meiden van Sander (van Miesje) an de Rienk een ijsje koape. 't Mot dus zeumer hewist weeze, want 's winters wier d'r hêên ijs verkocht. Toen vroeg êên van de meiden: "'Van wie bin jie een jongetje?'" Mien antwoord was geliek: "'Ik bin d'r êên van Mientje.'" En dae konden ze 't mee doen. Dus ze waeren nog nie vee wiesder. Naeder'and zien ze mien loape mee m'n moeder en toen wisten ze 't heliek netuurlijk.

Ik zà m'n eige us voorstelle, 't zit zo in mekoare: Ik bin een zeune van Mientje van Keesje Oage uut de Meulpad in Staevenisse. En mien voader was Wullem van Piet Foase uut de Langewegt in Setalland. Mà die is êêl jong hestorreve. En ik 'eb 'm nôôit gekend (ik was 14 maenden). Wat ad ik altied nog êêl jammer vinde, omdat 'r naemaete je ouwer ôôrd steeds meer vraehen komme.


M'n opa en opoe van moederskant waeren: Keesje Oage uut de Meulpad, een zeune van Izak Oage en Wullemien Roozemond. Ie was hetrouwd mee Joane Elenbaas, een dochter van Jap van Uipje en Koatje Oage.

M'n opa in opoe van voaders kant waeren: Piet Foase uut de Langewegt, een zeune van Wullem Foase en Anna van Oôst, en hetrouwd mee Meraeja Bruunzêêl, een dochter van Lieven Jewannes Bruunzêêl en Jewanna Kesoek.

Van 't jaer bin 'k 42 jaer hetrouwd, mit Hanna Schot, hebore

in Thoole as dochter van Jankees Schot en Jo Boay uut de Vischstraete. Toen eur voader is hestorreve, bin ze op Setaland komme weune, en is Hanna d'r moeder hertrouwd mee Arjoan van de Masjesee. En zo kwaeme m'n dus an mekoare en bin toen hetrouwd. Ons ebben drie jongers, in der bin van-eiges drie meiden biegekomme. En dae bin wêêr laeter negen kleinkinders uut voortgekomme (vuuf meiden en vier jongers).

Of me beroemd of berucht binne op durp dat weet ik nie, mà wè bekend. Me kregen un kêêr un nieuwsjaerskaerte uut Stêênberrege, en die was geschreve an Hanna en Kees in St.-Annaland. En deze kwam dus netjes mee de post an, bie ons in de busse. Op een andere kêêr kwam er een dochter van vrienden uut Zuud-Afrika vanaf Berrehe mee d'n auto en zag Thole op een bord staen en docht: hee daer weune op Setaland ome Kees en tante Hanna. Mà ze wist hêên achternaem of straete. Ze stopte bie de C1000 en vroeg an iemand bie de wienkel: „Ik mot bie tante Hanna en ome Kees weze. En ze wier geliek verweze: „Dan mot jie op d'n Oenderwegt weze bie Kees Foase. Want dae, dae weune ze!” En kiek, dat is noe het verschil mee vroeger. Niemand vroeg an eur: „Van wie bin jie d'r êên?”



*Ijsverkoop op de Ring door de
gezusters Westdorp van de
Javadijk.*